

MASALAH MINYAK IRAN AKAN MEMBAKAR DUNIA?

Masalah minyak di Iran yang dipunyai oleh anggota Iranian Company “yang telah dituntut oleh kerajaan Iran supaya dijadikan hak mutlak negeri Iran ini dari semasa ke semasa, dalam masa ditulis makalah ini, nampaknya semakin hangat kerajaan British yang diberitakan konon-kononnya telah menghantar Angkatan Lautnya dan menyiapkan pasukan payung terjun ini telah disambut oleh umat Iran sebagai suatu langkah paksaan dan maknanya peperangan! Iran nampaknya menentang dan boleh jadi keras dilawannya dengan keras. Sebab-sebabnya tentulah zahir bahwa jika tidak mahu menyerahkan telaga minyak itu kepadanya, Iran menentang dan tentulah ia akan tersedar kepada musuh kerajaan-kerajaan Demokrat yang bersempadan dengannya. Jika berlaku demikian maka akan menyala lagi sesuatu medan perang yang kedua sesudah kejadian di Korea! Yang demikian ini adalah menjadi suatu pertanyaan adakah “Minyak di Iran” itu akan menyala membakar dunia pula?

(oleh Ibnu Batuttah)

Sejarah pengeluaran minyak di Iran adalah berbalik kepada tarikh 28 Mei 1902 tatkala seorang Inggeris bernama (Walk Darace) mendapat kebenaran daripada kerajaan Iran selama enam puluh tahun. Bolehlah ia mengeluarkan minyak petrol dan menyediakan untuk jualan serta membawanya ke luar negeri termasuk beberapa jenis minyak yang lain di seluruh pemerintahan Iran dikecualikan lima wilayah yang terletak di sebelah utara.

Kerajaan British Campur!

Setelah enam tahun bertungkus lumus mencari maka akhirnya ia bersama-sama konco-konconya mendapat telaga minyak yang diidami itu sedalam 1180 kaki di suatu tempat yang bernama Midlani Tafaturan. Sebaik-baik sahaja minyak telah terpancar maka tertubuhlah syarikat minyak Inggeris – Parsi (sekarang syarikat Inggeris – Iran) lalu direntangkan sebatang saluran yang mengalirkan minyak itu ke “Abadan” dan di bandar ini telah didirikan sebuah kilang pembersih (penapis) minyak.

Dalam tahun 1914 Tuan Winston Churchill menjadi

ketua yang berpengaruh dalam Jabatan Kementerian Angkatan Laut British maka kerana kebijanya ia telah sedarkan kepentingan telaga minyak Iran lalu diikatnya dengan syarikat minyak tersebut suatu perjanjian yang mengkehendaki syarikat itu membekalkan Angkatan Laut British dengan minyak.

Dalam tahun itu juga kerajaan British telah melangkah lebih jauh lagi lalu mencurahkan modal ke dalam syarikat itu sebanyak lima puluh peratus daripada jumlah modalnya. Tidak berapa antaranya, telaga-telaga baharu telah didapati dalam lain-lain kawasan dan semenjak itu syarikat itu makin bertambah penting.

Kerajaan British yang menjadi tuan punya separuh modal syarikat itu telah mulai mencengkam dengan kekuatan siasahnya dan semenjak itu telaga-telaga minyak Iran telah bertukar menjadi punca perbalahan siasah di antaranya dengan kerajaan Iran dan dari masa itulah mulai orang-orang Iran yang berfaham Komunis mencelah ke dalam barisan kaum pekerja syarikat minyak itu lalu mereka menghasut dan terjadilah pemogokkan dan perkara yang tidak diinginkan.

Russia Mencelah!

Kemalangan yang telah menimpa Iran tidak terhenti setakat


itu tetapi bertambah pahit.

Beruang merah yang sedang tersergam dengan hebatnya di utara telah terus dahaga sangat dan sudah tentu dahaganya tidak akan hilang jika tidak diberi minum minyak petrol!

Lapun menggelisah lalu bergerak perlahan-perlahan dan mulai menunjukkan taringnya. Akhirnya Iran terpaksa memberi kebenaran kepadanya supaya ia mencari telaga minyak dalam wilayah-wilayahnya yang terletak di utara. Kejadian ini berlaku dalam tahun 1948.

Memandang seorang lawan telah turun ke gelanggang maka orang-orang British pun mulai memikirkan bagaimana mereka dapat mengalahkan lawannya yang bukan alang kepalang itu.

Setelah terbuka kepada mereka suatu jalan penyelesaian maka mereka pun mencadangkan kepada Russia hendaklah tiap-tiap kedua belah pihak menarik diri dari seluruh negeri Iran dan biarlah Iran untuk orang-orang Iran.



“Ayatollah al-Qashani” seorang ulama yang berpengaruh yang menjadi Yang di-Pertua Parti “Fadayan-e Islam” (pertubuhan berani mati). Sepatah kata yang dikeluarkan akan menjadikan negara Iran sebuah tasik darah ialah juga pendorong yang kuat yang menghendaki “Syarikat Minyak Anglo-Iranian dijadikan hak negara.

Persetujuan Didapati.

Orang-orang British dan Amerika telah menarik diri tetapi Russia hanya telah tersenyum lalu mengangguk-angguk kepala dengan tidak berundur barang setapak pun!

Tinggalah orang-orang Russian di sana menggerakkan kumpulan-kumpulan Komunis dan dengan angkara merekalah terjadi peristiwa “Azerbaijan”. Mereka juga yang telah memberi sepenuh-penuh bantuan kepada parti “Tudiah” yang berfaham komunis dan yang telah memaksa “Qawwam Al-Sultaniah” Perdana Menteri Iran pada masa itu supaya menandatangani surat perjanjian baharu berkenaan minyak petrol.

Perdana Menteri Main Kayu Tiga!

Wartawan “Samir Suki” dari syarikat akhbar “Dar al-Hilal” Mesir yang ia juga seorang pemberita “United Press” telah menerangkan perkara ini dengan lebih jelas :

“Sayalah wartawan yang tunggal – kata Samir Suki – yang telah melihat dengan mata kepala saya akan “Sadchikov” Duta Russia di Iran sedang keluar dari bilik Perdana Menteri Iran membawa surat perjanjian minyak yang telah dimeteraikan pada 12 April 1946. Kejadian ini berlaku Pada pukul 4 petang. Sepeninggalannya saya pun masuk berjumpa Perdana Menteri itu lalu bercakap-cakap dengannya kerana saya memang biasa dan mempunyai perhubungan yang telah mesra dengannya.

“Saya masih ingat perhubungan bahawa ahli siasah yang bijaksana itu telah membayangkan kepada saya pada hari itu bahawa ia terpaksa menandatangani surat perjanjian tersebut kerana itulah sahaja jalan yang tunggal bagi menyelamatkan Iran. Ia telah bermain kayu tiga kerana hendak menyelamatkan negeri daripada bencana Russia. Setelah habis masa yang gelap itu maka Majlis Parlimen Iran telah bersidang pada bulan Oktober 1947 lalu menolak bentang akan ikatan perjanjian tersebut!”

Peristiwa yang Menggemparkan.

Tuntutan Iran hendak menjadikan “syarikat Inggeris – Iran” hak negara adalah ibarat letupan sebutir bom yang telah menggegarkan kalangan-kalangan siasah, peperangan dan iktisad di seluruh dunia.

Meletupnya bom ini ialah dalam masa pengubal-pengubal siasah Barat sedang memikirkan sebenar-benar rancangan yang pernah dirancang di sepanjang-sepanjang sejarah minyak.

Mereka sedang memikirkan telaga-telaga minyak yang di selatan Iran yang sedang menarik perhatian dunia baharu-baharu ini, dan mereka sedang mengkaji dengan teliti akan rancangan hendak merentangkan saluran minyak dari selatan Iran ke selatan Perancis. Rundingan-rundingan berkenaan rancangan ini telah pun berjalan di antara orang-orang Inggeris pemegang hak “syarikat Inggeris- Iran” itu dengan beberapa Syarikat-syarikat Amerika yang sanggup melaksanakan rancangan yang besar ini. Dan yang telah pun terlebih dahulu daripada ini berjaya merentangkan saluran-saluran minyak dari kawasan negara Arab Saudi hingga ke pantai Lubnan.

Kepentingan rancangan ini rasanya tidak terselindung daripada sesiapa, kerana biasanya pada masa yang lalu minyak Iran diangkut oleh kapal-kapal minyak dari Teluk Parsi lalu dibawanya ke Eropah dengan melalui Laut Merah dan Terusan Suez setelah direntangkan saluran maka minyak itu pula telah dialirkan melalui negeri Iraq ke negeri Syam dan dari sana minyak itu diangkut oleh kapal-kapal ke pantai-pantai Eropah. Pada kedua-dua cara pengangkutan tersebut banyak merugikan iktisad berkenaan masa dan perbelanjaan, dan inilah yang telah mendorong pemodal-pemodal British hendak menyambung saluran itu dari pantai Lubnan dengan merentangnya dalam laut Mediterranean ke Eropah.

Tamak Membawa Bencana!

Baharu-baharu ini syarikat Amerika yang mengeluarkan minyak di negara Saudi telah berjaya mengikat suatu perjanjian



Al-Qashani dalam masa pembuangannya di Beirut dahulu. Di sini kelihatan beliau sedang melawat sebuah sekolah tinggi di sana.

-----*-----*-----

yang dipersetujui oleh kedua belah dengan membahagi dua akan keuntungan yang didapati daripada hasil minyak di antaranya dengan kerajaan Saudi tetapi “Syarikat Minyak Inggeris -Iran” tidak sanggup menerima seperdua hasil keuntungan minyak yang didapatinya di Iran dan kerana inilah telah timbul perbalahan yang berakhir kerajaan Iran telah mengambil keputusan hendak menjadikan syarikat itu hak negara.

Patut juga disebut untuk menunjukkan hakikat yang benar bahawa kerajaan Iran telah mendapat faedah yang besar daripada syarikat minyak itu. Daripada jumlah pekerja-pekerja yang sebanyak 55,000 yang bekerja di dalamnya maka 50,000 daripada mereka itu ialah orang-orang Iran. Manakala jumlah gaji yang dibayar oleh syarikat itu kepada pekerja-pekerjanya lebih daripada semilion pound sebulan.

Bagaimana Iran Menyelenggarakan Minyaknya?

Setengah orang berpendapatan bahawa keputusan Iran hendak menjadikan perusahaan minyak itu hak negara akan menjadikan kerajaan Iran menghadapi beberapa kesukaran

yang tidak boleh diperkecilkan yang dikehendaki ia mengatasi sehingga tindakannya itu mendatangkan faedah yang sebenar-benarnya. Sementelah pula soal ini bukan soal mengeluarkan minyak sahaja tetapi ialah juga bagaimana cara mengangkutnya dan menjualnya. Syarikat-syarikat minyak yang besar di dunia biasanya mempunyai kapal-kapal pengangkut sendiri dan berpengaruh besar dalam seluruh jalan lalu lalang. Oleh itu maka kerajaan Iran akhirnya akan terpaksa mengikut perjanjian dengan syarikat-syarikat besar tersebut yang dengannya ia akan dapat menyelenggarakan minyaknya ke seluruh pasar-pasar dunia barat.

Kalau pula Iran hendak menjual minyaknya kepada Russia pun bukan sedikit halangan yang akan merentangnya kerana tak dapat tiada dikehendaki ia merentang saluran-saluran minyak dari selatan Iran ke Russia pada hal segala bukit bukau dan gunung ganang di antara kedua buah negeri itu terlalu sukar dan harus akan menjadi mustahil hendak menembusnya. Dalam pada itu jangan lupa bahawa besi waja yang daripadanya diperbuat saluran-saluran minyak itu tidak boleh didapati melainkan di Amerika Syarikat, dan kerana inilah Britain telah berunding dengan beberapa syarikat-syarikat Amerika dalam perkara merentangkan saluran-saluran minyak sebagaimana rancangannya yang tersebut di atas itu.

Minyak Timur Tengah Penting!

Keluaran minyak di Timur Tengah terutama di Iran sangat-sangat penting kepada dunia meskipun minyak petrol yang dikeluarkan oleh Amerika sangat besar jumlahnya tetapi telaga-telaga minyak Iran lebih kaya dan melimpah-limpah kandungannya.

Doktor "Ibtariat de Joilo" salah seorang pakar Amerika berkata berkenaan minyak telah membayangkan kepentingan minyak Timur Tengah katanya : "Pusat pengeluaran minyak sedikit demi sedikit akan beralih dari Amerika ke Timur Tengah dan akan berkekalan peralihan itu sehingga akan terhentinya di situ."

Sehingga tahun 1987 telaga-telaga minyak di Amerika

mengeluarkan minyak yang sangat besar jumlahnya dan lebih daripada yang digunakan olehnya, tetapi hajatnya kepada minyak makin sehari makin bertambah besar lebih-lebih lagi tatkala ia hendak membekali Eropah barat sesudah diadakan berbagai-bagai rancangan yang luas yang telah sempurna sekarang untuk menentangi gerak langkah Soviet Russia.

Inilah sebabnya yang mendorong orang-orang American dan rakan-rakan mereka – Inggeris, Perancis dan Belanda kepada mengusahakan minyak Timur Tengah dan menyelenggarakan pengangkutan lalu mereka merentangkan saluran-saluran minyak meredah negara Iraq dan Syria ke pantai Mediterranean. Saluran-saluran ini telah menyelamatkan soal pengangkutan melalui jalan laut yang sepanjang 3,500 batu dari teluk parsi ke laut Mediterranean. Selain daripada belanja 40,000 dollar yang akan dibayar oleh tiap-tiap sebuah kapal minyak kepada syarikat Terusan Suez.

Bukan Soal Siasah Sahaja!

Di sana ada tiga saluran yang mengalirkan sebahagian besar minyak Timur Tengah ke pantai mediteranian. Pertama, dari negara Saudi ke Lubnan. Kedua, dari "Kirkuk" (di Iraq) ke Turbelas di Suria. Ketiga, dari "Kirkuk" ke Chepa tetapi saluran ini telah terbengkalai semenjak terbit peperangan Palestin. Satu lagi sedang dikerjakan dan hampir siap iaitu dari Kirkuk ke "Baniyas" di utara Turbelas

Pakar-pakar minyak tersebut sedang merancangkan hendak meminta dua saluran lagi. Satu dari "al-Kuwait" ke pantai Mediterranean dan dengan satu lagi dari "Abadan" di teluk parsi hingga ke Lubnan. Yang akhir ini akan disambungkan dengan melalui dalam laut Mediterranean hendak ke selatan France.

Sebagai menggambarkan bagaimana besar modal yang sedang dicurahkan untuk perusahaan ini – maka saluran yang telah dibina dan direntangkan dari kawasan Saudi hingga ke Lubnan adalah perbelanjaannya sebanyak 516 (lima ratus

Dengan ingatan tulus yang ikhlas mengucapkan

SELAMAT HARI RAYA

S O BAMADHAJ

Singapura dan Johor Bahru

KEDAI BALDU YANG TERKENAL

enam belas) million dolar. Berapa pula belanjanya

disambungkan hingga ke selatan negeri Perancis?

Rasanya tidak akan terselindung dari sesiapa bahawa soal minyak ini bukanlah soal iktisad semata-mata, bahkan mengenai siasah, dan peperangan. Angkatan-angkatan tentera zaman sekarang menggunakan bermilion-milion gelen pada tiap-tiap hari, Dalam pada itu syarikat-syarikat yang menjalankan perusahaan itu dikehendaki bercermat daripada menyentuh masalahat negeri tempat ia menyedut minyaknya, kerana sebarang kesalahan siasah yang dilakukan olehnya akan menimbulkan peristiwa yang buruk sebagaimana keburukan yang telah berlaku kepada "syarikat minyak Inggeris-Iran" yang akibatnya Tuhan sahaja yang akan mengetahuinya!

Bagaimana besar pengaruh minyak Timur Tengah dapat dilihat daripada jumlah yang dapat dikeluarkan olehnya :

Iran	mengeluarkan	31,800,000	tan
Saudi	"	27,000,000	"
al-Kuwait	"	17,200,000	"

Iraq	"	6,000,000	"
Mesir	"	2,000,000	"

Hasil minyak sedunia dalam masa setahun 1950 ialah:

Amerika Syarikat	270,000,000	tan
Timur Tengah	87,000,000	"
Venezuela (Amerika selatan)	78,000,000	"
Russia	27,000,000	"
Indonesia	7,000,000	"

SELAMAT HARI RAYA

S. K. ABDUL RAHMAN

463, JALAN ALSAGOFF
PONTIAN KECHIL, JOHORE.

Penjual buku-buku, majalah-majalah, kitab-kitab,
barang-barang makanan dan kain-kain.